




Zwou Buergen, eng Traditioun: d'Buergbrennen an der Gemeng Nidderaanwen

D'Buergbrennen ass wuel ee vun de bekanntsten a symbolräichste Bräich am Land. All Joer, zum Schluss vun der kaler Saison, kommen d'Leit zesummen, fir duerch d'Entfache vun engem grousser Feier, de Wanter „ze verbrennen“ an d'Fréijoer ze begréissen. Et ass en alen heednesche Brauch, deem d'Liicht an d'Hëtzt zeréck an d'Dierfer brénge sollt, eng Traditioun, déi bis haut a ville Gemengen net u Bedeitung verluer huet.

Och bei eis an der Gemeng spillt d'Buergbrennen nach ëmmer eng grouss Roll. All Joers ginn net nëmmen eng, mee direkt zwou Buergen opgeriicht a verbrannt: samschdes owes zu lernster a sonndes owes zu Nidderaanwen. Béid Evenementer hu schonn eng laang Geschicht an hir ganz eege Charakteristik. Wat se verbënnt ass dat grouss Engagement vu ville Benevollen.

Dëst Joer falen d'Buergbrennen op de Weekend vum 21. an 22. Februar, traditionell ass et ëmmer den éischte Sonndeg no der Fuesent, och „Buerghsonndeg“ genannt.



© Uli Fielitz

Heemeleg mat vill Häerz: d'Buergbrennen zu lernster

Zu lernster gouf d'Buerg laang Zäit vun de Jonken aus dem Duerf opgeriicht. 2008 ass d'Traditioun duerch en Opruff ënnert de Bewunner nei opgebléit, a vill Leit hu sech bereet erkläert, eng Hand mat unzepaken. Doropshin ass dunn och de Veräin lernster Stoussnéckelen entstanden, deem zënterhier mat vill Häerzblutt fir e schéint Buerghbrenne suergt.

D'Buerg steet op der Duerfplaz, engem zentrale Punkt, wou vill Leit sech versammele kennen an eng gemittlech Atmosphär entsteet. Flott ass och déi direkt ugrenzend Spillplaz, wou sech d'Kanner de ganzen Owend iwwer amuseiere kennen. Historesch gesinn huet d'Buerg schonn op diverse Plaze



© Uli Fielitz

gebrannt, esou ënner Anerem vun de 50er bis 90er Joren um lernsterbiert, éiert se du fir e puer Joer op d'Wéilt geplënnert ass. Zanter 2008 ass d'Duerfplaz nees déi fest Plaz fir dëst grousser Feier. D'Buerg zu lernster ass ëm déi siwe Meter héich a gëtt aus Palletten, Stréi an ale Chrëschtbeemercher zesummegezat. D'Material gëtt iwwer d'Joer gesammelt, mee déi tatsächlech Virbereedunge fänken ongeféier zwee



Méint virdrun un. Eng Woch virum Buergbrenne geet et mam Opriichte vun der Konstruktioun lass, an den Dag virdu gëtt de Catering preparéiert.

E wichtege Bestanddeel vum Owend ass de Fakelzuch, dee vun der Schoul bis op d'Duerfplaz féiert. De Verkaf vun de Fakele gëtt traditionell fir e gudden Zweck gespent. Eng schéin Traditioun ass och, datt eng Koppel, déi am Joer virdu bestuet oder gepacst gouf, d'Buerg ufänkt. Wann et keng esou Koppel gëtt, gëtt Feier vu jidderengem zesummen entfacht. Fir d'Leit gëtt et ganz traditionell Wurschte vum Grill a Lësebuli mat oder ouni Fleesch – zwee Klassiker, déi ëmmer gutt ukommen.

Imposant mat staarkem Zesummenhalt: d'Buergbrennen zu Nidderaanwen

Sonndes owes steet d'Buergbrennen zu Nidderaanwen um Programm. Organiséiert vun de Buergfrënn zesumme mat de Scouten, huet dësen Owend sech an de leschte Joren zu engem richtegen Zuschauermagnéit entwéckelt. Och hir Geschicht geet wäit zeréck: fréier haten d'Scouten hiert eegent Buergbrenne beim Scouthome, an op der anerer Säit vum Hiwwel hunn d'Pompjeeën hir Buerg verbrannt. Iergendwann ass decidéiert ginn, sech zesummen ze doen an aus zwou méi kleng Buergen ass eng grouss ginn. Vill Jonker, déi deemools gehollef hunn, si bliwwen, och wann se net méi aktiv an engem Veräin waren. Aus hinne sinn dunn d'Buergfrënn entstanden, déi sech och haut nach mat vill Leidenschaft ëm d'Opriichte vun der Buerg bekëmmere, während d'Scouten d'Verpfleegeung an d'Logistik den Dag selwer iwwerhuelen.



© Uli Fielitz

D'Buerg gëtt op engem grousser fräier Site tëschent Nidderaanwen a Mënsbech opgeriicht, eng Plaz, déi Raum fir déi vill Visiteuren an déi grouss Konstruktioun bitt. Mat sengen 21 Meter Héicht a 14 Meter Breed ass d'Buerg och nach vun der Autobunn aus ze gesinn. Och dës Buerg besteet haaptsächlech aus Palletten, Holz an Chrëschtbeem. Am Ganze ginn tëschent 2.500 an 3.000 Pallette verbaut.

D'Organisatioun an d'Virbereedung fänke scho laang am Voraus un: Gutt 6 Méint virdrun treffe sech déi zwee Veräiner fir déi éischt organisatoresch Froen ze klären. Ab deem Moment ginn och schonn aktiv Palletten organiséiert an agesammelt. Woch virum Buergbrenne ginn d'Stämm fir d'Tierrn gesat an déi Woch virum Event gëtt all Dag vun 10 Auer moies bis dass et däischter gëtt geschafft. Fir e gudde Maufel suergen d'Scoute ganz klassesch mat Gegrills an hirer beléiften Lësenzopp (och an enger veganer Variant), fir vill Leit a Kombi mat engem leschte Glühwäin fir dës Wintersaison.



Dëst Joer feieren d'Buergfrënn hiert 10-järegt Bestoen, d'Visiteuren dierfe sech also op eng extra imposant Buerg freeën.

Eng Traditioun, déi verbënnt

Zum Buergbrenne gehéiert awer net nëmmen den Dag vum Event, mee och alles wat ronderëm geschitt. Eng flott Traditioun, déi dozou gehéiert, ass d'Ophiewen. Op béide Plazen zéien d'Veräinsmemberen duerch d'Dierfer, kommen an de Kontakt mat den Awunner, erzielen hinne vun dësem Brauch a lueden se perséinlech op hiert Fest an. Egal ob zu lernster oder zu Nidderaanwen, d'Buergbrenne weist all Joer op en Neits, wéi vill Wäert an eiser Gemeng op Zesummenhalt geluecht gëtt. Et ass e Moment, wou nei an al Awunner, Familljen a Frënn zesummekommen, fir ze laachen an ze feieren. Wann d'Bauhäre stolz vun ënnen op hir fäerdeg Buerg eropkucken, an d'Leit beim Laanschtfuere stoe bleiwe fir déi mächtig Konstruktioun ze bestaunen, dann ass dat fir si ëmmer déi bescht Bestätegung, datt all d'Méi vun de Wochen a Méint sech gelount huet, wuelwëssend, dass se e puer Stonnen drop scho rëm a Flamen opgeet.



© Uli Fielitz

Déi dräi Veräiner si sech eens: et ass wichteg, och weiderhi jonk Leit ze motivéieren, fir dës Traditioun virunzedroen. Wéi an deene meeschte Veräiner ass och hei den Nowuess net selbstverständlech. D'Organisateure wënschen sech, datt d'Buergbrennen nach laang als Traditioun erhale bleift an och an Zukunft sécher an ouni Restriktiounen gefeiert ka ginn. Si sinn dankbar fir all Ënnerstëtzung, déi si vun de Gemengeservicer an de Sponsoren kréien, sief et beim Asammele vun de Chrëschtbeem, beim Opriichte vun den Zelter, duerch d'Bereetstellung vu Material a Maschinnen oder och duerch finanziell Hëllef. Ouni dës Zesummenaarbecht wier esou en Event kaum ze stemmen.

D'Buergbrennen ass méi wéi just e grousst Feier: et ass e Stéck Identitéit, e Symbol vu Gemeinschaft an e wichtige Moment, deem d'Awunner aus der Gemeng Nidderaanwen all Joers nees zesummebréngt.